

Fu posto per li Consieri, atento questo Luio passato a Bergamo fusse roto le porte di la caneva di daziari dil sal ch'è sora la piazza, e tolliti zercha duchati 500, per tanto sia preso che publice a Bergamo sia publicà che quelli acuserà e si habbi la verità, habi di taia lire 500, *ut in parte*. 152, 0, 0.

Noto. In questo Pregadi, a la parte posta per li Reformadori dil studio, sier Nicolò Michiel el dottor andò in renga, et voleva li doctori non lezeseno la festa etc.

105¹⁷

A dì 10. La matina, fino al tardi non fo alcuna lettera da conto.

Di campo, da Martinengo vene lettere dil proveditor Emo di 8, hore 3 di note. Come havendo cavalcato con lo illustrissimo signor Duchà governador sulle rive di Ada per trovar uno alozamento, haveano visto il loco di Trevi esser molto a proposito, qual con 1500 guastadori lo farano inexpugnabile; però hanno terminato andar col campo ad alozar de li, et cussì se leverano. Hanno mandato a Milan 4 contestabeli con 1000 fanti rechiati dal signor Duchà et signor Prospero, non per bisogno, ma per dar cuore a milanesi, i quali però stanno di bon animo; et inimici par siano *omnino* per levarsi; con altre particutarità, *ut in litteris*. Et che dovendo pagar li fanti, esso Proveditor havia sospeso il pagar, perchè si francesi andaseno via, tanto sarieno butà via.

Et per Collegio li fo risposto che li doveseno pagar *omnino*, perchè non pagandoli si partiriano e potria nostri aver qualche scorno.

Item, fono lettere di qual fo lecte con i Cai del Consejo di X, di grande importantia.

Da Crema, dil podestà et capitano Foscarri, di 8, hore 3 di note. Revocha quanto scrisse francesi esser levati di Milan: *imo* sono dove i erano, et danno voce volerli dar uno assalto.

Di Bergamo, vidi lettere di 8, hore 3 di note. Come in quella sera è gionto uno suo explorator de campo, che francesi sotto Milano se partite heri de li, et afferma esso exercito non esser levato de li, ma ben dice che heri matina a bona hora el signor Renzo con quelle gente erano a Monza, et *cum* alcune altre de lo exercito grande se inviono a la volta de Pavia con 7 pezi de artigliaria grossa, et alcuni altri da campo. Non se pol saper che effecto voglino fare, *tamen* si tien al tutto converano a suo mal grado partirsi senza bono effecto. In Milano ogni hora le victuarie abbondano per esser aperta la

strada de Como et monte de Brianza. Et questo exploratore dice haver inteso, che in Milano la farina era molto callata de precio; ma ne lo exercito, francesi ne hanno 5 unze di pan al marcheto, perchè ditto explorator ne ha portato uno li a Bergamo. Sguizari per quanto dicevano, al tutto se volevano partire. *Item*, per altra via hanno, de uno che vien de paese de sguizari, come il re di Franza havea mandato a Surich a far una dieta per levar 12 milia sguizari contra il ducha di Barbon; ma che se iudichava certo non consentiriano; et li volevano tuor ad interesse per non haver li danari prompti. *Item*, essi rectori scriveno come lo illustrissimo Governador nostro et clarissimo Proveditor zeneral han levati de li, heri . . . fanti, et hozi 800, et li hanno fatti andare tutti a Trezo: ne restano *solum* in Bergamo 500.

105^{*}

Da poi disnar, fo Consejo di X con la Zonta, et steteno fino hore 5 di note, et expediteno il Contin da Martinengo condutier nostro, stato in Toreselle zà mexi 15, et lo asolseno, sichè ritornerà capo di la sua conduta, con condition però di dar segurtà per ducati . . . milia di . . .

Item, fono sopra la cossa di danari dil prior di la Cha' de Dio Mozenigo, intervenendo li Cataveri, et fu posto una parte che

In questo zorno, fo sepulto a san Francesco di la Vigna sier Beneto Gabriel qu. sier Alvise, qual è morto senza heriedi. Ha lassato facultà di ducati 20 milia, tra i qual legati ducati 150 d'intrada a l'anno da poi anni 5 a l'hospital di infermi di mali Incu-rabelli dil qual è procurator et protetor. E cussì so mojer dil testamento non parlò più; ma driedo il cadeleto qual fo portà con la soa Scuola di et et Iesuati, *etiam* andono drio a la sepoltura li colega procuratori dil ditto hospital con mantelli, *videlicet* sier Vicienzo Grimani fo dil Serenissimo con mantello beretin, sier Sebastian Contarini el cavalier, sier Piero Badoer el governador di l'intrade, sier Antonio Venier fo Consier, sier Agustin da Mulla fo proveditor in armada, sier Piero Contarini qu. sier Zacaria el cavalier, Francesco di Zuane toschan et alcuni altri, sier Zuan Antonio Dandolo *etiam* procurator dil ditto hospital e podestà di Chioza. Andono *etiam* le done procuratrice dil ditto hospital; sì che fo bel veder. È morto con fama di homo da ben, catholico e religioso. Lassa assa' legati. A la mojer tutta la soa dota et ducati 200 d'intrà in vita soa. A soa sorela Maria Lodovica ducati 200 d'intrada, a sier Nicolò Erizo so nepote ducati 150 d'intrada, altri legati

(1) La carta 104^{*} è bianca.